

四庫全書

集部

欽定四庫全書

集部

石倉歷代詩選卷五百  
三二

詳校官右中允臣薩敏

侍讀臣孫球覆勘

總校官進士臣朱 鈐

校對官編修臣吳裕德

謄錄監生臣朱 思

欽定四庫全書

石倉歷代詩選卷五百二

明  
曹學佺 編

明詩次集一百二十六

莫止

開園

開園近南郭日涉聊自適  
卉木各蔥蒨花開間紅白  
力作督僮奴循行謾扶策  
編茅八九間疏渠十餘尺  
未擬柴桑居竊

比揚子宅菜熟不食心果熟不鑽核夜無扣門吏時欸山中客歌謳雜諧謔豪飲至一石世事問不知牀頭有周易

次韻楊儀曹君謙題國賢將石亭

惠泉在天下品味少班列公心有深眷睽遠攜未輟所憂出山去本味損甘冽相傳茲山石投甕解湍雪甘冽每如故所適任燕越泉石本一氣妙訣非有別名亭紀幽事塵想永消歇慎勿倦攜持誰當笑癡絕

玩水中新月

新月來何時娟娟影溪曲問之寂無言似愛春波綠彎  
環一鉤小光彩已優渥爛若出冶金滉漾眩人目鱗潛  
或羞明鷗夢亦初熟我從溪上行俛仰趣自足良夜難  
屢逢遲遲惜歸躅

古意

古人遠馳使餽我雙鯉魚烹魚問起居不見尺素書應  
是衷情多把筆不成題綢繆古人意久為故人期兩心  
如相知豈待覩縷辭兩心不相知對面隔九疑寘魚坐

長歎河水正東馳

張仲正野仙歌用琴川錢工部韻

當時飲中稱八仙趣味到此難  
黃緣野仙又出四明客  
傾蓋況在清樽前紅梅花開賞  
春霽朱簾綠幙齊高寒  
吾儕水部本好士未是佳客何  
曾延野仙南來致雙鯉  
中有尺素從兩錢乃知行跡徧  
海壖乘春卻踏梁溪船  
好山好水入揮洒意匠所至無  
餘賸得來贈遺多妙墨  
鸞儀鵠影驚聯翩酒酣運筆等  
堊帚高堂白日生雲煙

豈須藏襲待他日放手已見人爭傳行囊中有端石堅  
品高不肯隨時妍三花插巾笑起舞但脫俗韻稱高賢  
吾歌野仙止於此此意已逐高鴻騫

次韻吳晉卿遊金山

海門蹙處江濤重金鰲浮出何穹窿駕天長橋倩誰作  
倒影先入樓船中天光上下夾明鏡漫托焦山作隣並  
半空樓觀起玲瓏達士胸襟儼相映碣石砥柱遠莫叅  
氣勢橫絕江之南中冷况復徹肝肺品味豈數南陽潭

江風山月世鮮好不是飛仙不能到妙高臺上一招手  
挽却行雲迴鳥道兩儀始判濁與清留此突兀知何情  
頽波一障亘萬古媧皇愚公休結盟謫仙少陵欠題句  
却有坡翁能表著明將濯足上蓬萊不許龍宮吐煙霧

王中舍孟端山水

春山遶屋春日長野水拍岸桃花香高人歸來自遠成  
樂土可樂矧故鄉棲遲未穩徵書下攬衣簪筆登玉堂  
登玉堂山水之趣中弗忘却染吳絳近盈咫尺千里江南



宛如是

大山樵者歌贈固始李遠

安陽之山幾千仞勢與浮光角雄峻野人不識呼大山  
複嶺迴崖足難進青蓮居士遺雲仍芒鞋資斧時憑陵  
良材異卉俱在眼用舍一一惟其應來往窮絕徑煙霏  
長滿衣白龍池頭弄明月翠蘿影裏迎涼颺靜欣紫霞  
賞遠訂滄洲期倚松砵長嘯滅跡稀人知邇來入三吳  
又復事登陟南山南北山北搜奇訪古無遺力呼筆閒

施彩繪新橫琴快拂朱絲直邂逅太湖上一笑無先容  
青春欲暮煙花空掃花坐石開心曾高山流水杳無際  
無言默送孤飛鴻

昔人墓

昔人墓作今人墓今人知與何人作昔今代謝如暑寒  
青山不改常時顏白雲笑我對青山何不且作生前懽  
送人遊武當

武當之山天下奇我獨未到空懷思君今一日先我往

為寄此意山靈知天梯雲磴幾千折笑看輿人曳繩鐵  
盤桓歷覽神轉彊胸中自有登山訣

整拭古琴

紛紛世上箏琶耳古樂亡來孰經理囊中幸有孤桐枝  
絙以朱絲差可喜猗蘭自足繼南薰何用廣陵傳法指  
有絃吾學陶公無有心不與鍾期死小齋栢子時一焚  
便若置我山谷裏悠然直作羲皇人月到窻前一泓水

海月圖為鄒永正賦

髯翁家住東海頭胸次直欲凌高秋陳編往牒競探摘  
新詞吐出鏘琳瑯邇來蹤跡更奇絕踞石中宵玩明月  
銀丸滉漾青琉璃空濛萬象俱涵澈招呼浮丘揖任公  
下上八極神遊中丹霞山人忽相遇片紙點染何昭融  
手持視我我心醉權入濠湖竟無睡超然起望海天高  
捲盡纖雲月初霽

無菊嘆

去年旱劇今苦霖佳菊槁爛俱莫禁  
資施葦莽競蕃殖

人力弗掇天難謀維時九日潦未息出門一望江湖白  
悠悠千古徒有懷坐對空樽日西夕

送熊山人

山人日昨匡山來雙屨尚帶匡山苔譚山說水神轉健  
白日口角生風雷方輿萬里若指掌聽者如堵皆顏開  
梁清溪頭脩言別更踏何處煙霞堆達人遊陟先海岳  
潢池培塿胡為哉何時重飲惠泉水我欲與究玄黃胎  
仁和朱彥明母董氏旌節

凌雲綽楔從平地五色龍鸞萃雕麗過客憑車為改容  
歎息楣間旌節字練裙縞帶堂中人到此知甘幾勞悴  
總是皇天作鑒明亦有佳兒相其志當時自顧嫌少年  
不道今經甲子旋孱然一身壯門戶泉臺有聞當解顏  
清泉為釀玉為膾鶴髮方添境方泰坐使吳山遊女羣  
一日風聲盡沾漑

春陰即事次二泉韻

小閣晨光慢殘缸宿燼紅春停煙雨外人坐寂寥中土

脈融猶淺鶯聲澁未工忽驚書帙亂無賴是窻風

舟中望雲海亭時曙色未分且風利不得泊

拂曙過青山荒亭杳靄間十年曾我到一日豈天慳湖  
面雲增闊崖跟浪打頑興亡今古外鳬鴈自飛還

次韻二泉坐月

清曉林風轉黃昏月滿庭野寒人落落地濕草青青竹  
几當窻設煙鐘隔水聽此時誰縮地一上海天亭

北山秋思二首

十月旬將及一年秋始殘自憐柴榻穩未覺布袍單  
骭  
髒從吾拙尋常應俗難古今成俯仰時復有餘歡

三日雨不絕山中天所留泉聲琴筑和樹色碧蒼稠  
言  
話須誰共簡編良我儔澄然神觀寂無處起窮愁

庭蕪

嬾性任庭蕪疎簾映槁梧雨寒先宿燕溪晚競招鳬  
獨  
趣幽花檻時情濁酒壺等閒今又古何用問誰吾

道在



道在從吾嬾家貧覺慮輕閒觀乞米帖喜得煮茶鐺情  
話逢誰洽詩逋積未賡落花風雨夜一笑悟浮榮

八月十九日登雨花臺

石子爛斑草半黃幽林窄徑轉重岡斜陽欲下鳥相喚  
急雨乍收山更蒼萬里長江天設險五雲深闕地生光  
曇花往事憑誰問仰見皇圖億世昌

仲冬之月獨行小圃視敗菊本咸有生意仍得  
晚花一朶把玩久之

步屨籬根訝剩金絕憐孤蹇不勝簪貞心到死香猶在  
細蘂回春意已深寥落園池花事畢交加冰雪歲寒侵  
欲餐未忍還惆悵賴有江梅與嗣音

次韻楊長史崇周閒居

庭草青青生暖煙壁間琴久欠徽絃箋天舊草三千疏  
漫興新題一百篇林鳥巢多知地穩水花開晚為誰妍  
到門溪漲喧漁子涸鮒膠舟憶去年

過渠南一老亭再用長史韻酬絅菴

六月池亭飛水煙風光宜誦也宜絃閒談試聽皆深趣  
佳製爭傳或半篇牆入青山低正好石添蒼蘚老逾妍  
步趨矍鑠顏丹渥誰信先生八十年

先廬

照人溪色動春陽簡點先廬未就荒簷檜轉添霜後翠  
庭蘭不歇雨中香癡頑兒子聊書課衰病形骸半几牀  
謝遣紛華絕馳騁韋編筠管謾徜徉

渠南一老亭次韻

石渠悠悠南有亭亭中人物少微星新添十竹皆紫玉  
恰對九峯如畫屏觀物襟懷閒處愜倚牀詩夢午時醒  
逍遙此是長年國天地誰拘跡與形

次韻為錢子山悼亡

眼中那意百年人只共持家兩度春羅帶繡鴛鴦結恨  
鏡臺雕玉易承塵良宵缺月窺簾竹伏日飛霜殺渚蘋  
若問讀書湯茗事于今惟有一燈親

追次王友石中舍竹茶爐韻

著眼山中茗具幽自應題品屬名流身經宿火三千劫  
骨透清風一段秋錐不入尖搏土密鬼難施巧織筠稠  
若窮衣鉢傳來處直自銷金象九州

次韻匏菴學士題復竹茶爐卷

剪竹攢爐為品泉泉清惟稱露芽煎常於學士幽人側  
更在孤猿落月前失脚誤投金帳去灰心曾伴玉瓶眠  
石頭舊路誰云滑自喜歸來色相全

歙縣許良佐西園

其先有南園歐陽公  
王荆公嘗為序記

略約斜斜度小谿路從南畔又迴西年時不種閒花草  
世德常看舊品題葵茁露叢無踐馬桑籠樹色正鳴雞  
田廬近接渾成趣一卷幽風一杖藜

沈氏園賞菊次韻施克和呈在座

清瘦頻年種菊忙主人真似沈東陽山潭飲水能多壽  
澤國食英不是狂小引壺觴乘夕霽漫憑歌咏答年芳  
相看興到悠然處試數從來得幾場

觀瓊花集

無雙亭下淮南游天上人間僅此花  
九朵攢來呈玉質  
兩迴開處占年華  
榮枯與世如相系  
雷雨何時却再芽  
一去永遺塵土累  
瑤臺空鎖舊煙霞

幽居景物二首次西涯翁韻

連林映郭弄晴暉  
誤道浮嵐認却非  
杜老物華詩點染  
房山水墨畫稀微  
靜兼花影初搖砌  
細雜苔痕欲上衣  
獨倚江南望江北  
天空高鳥一時歸  
右樹色

庭花風落正堪憐  
好鳥飛來近我前  
似惜春歸情謾訴

雅舍歌調譜難傳令人倚樹立不倦歌枕拋書起又眠  
況復流泉當戶外匣琴終日懶揮絃  
右鳥聲

次韻寄題俞司諫國昌待曙樓

櫺軒高架絕塵霏銀燭燒殘萬籟稀清禁似聞聲動鑰  
明河漸見影承暉捫心默感時難際觸事寧禁思欲飛  
更倚雲梯增悚惕君王勤政正宵衣

次泉翁二月廿五日聽松菴韻

軟輿輕蓋度幽林一路紅芳襯綠陰飛盡茶煙知日午



添多山色愛春深竹松爭仰千尋榦泉石真宜萬古心  
況是高賢舊遊地可能無語托新吟

次韻泉翁點易臺述事

有懷長愛賦閒居漸老尤耽四聖書滴露松高山轉靜  
登臺天闊意還餘一泓泉水淵源在數點梅花卦畫如  
到得忘言惟莞爾豈知玄後更潛虛

金山聽潮軒次江陰徐若容韻

坐來心目兩悠悠佳勝都從指顧收返照倒穿崖隙上

輕雲時傍席間流潮當險阻聲偏壯客為江山跡謾留  
到此杳然塵土隔却憐身與世俱浮

訓泉翁喜晴

晴光日照山中何物還能縈此身小閣凝香春自盎  
碧潭行影畫難真林稀落葉風初定畝剩棲糧歲不貧  
笑語平生諸故舊衰年容有未閒人

寄朱山人

幾欲候公湖水濱不堪彌月黯春雲牀頭麴米計已漉

籬脚杞叢行可分精力底須青竹杖雅懷多在白鷗羣  
蒲輪到日從容謝自有兒郎能致君

次韻立之宿華汝瞻膠山新野

濠湖幽處水南涯竹映藤披似浣花地主軟炊菰米飯  
山僧清供乳泉茶書氈意煖回春律銅鉢歌長及曙鴉  
文會遙憐嗟未與好風吾亦辦輕槎

遊華藏寺次水部家叔韻

江湖無地不安恬夢裏尋山興轉添水鷁影飛青舫小

墨花香簇紫毫尖拈來釣竹雲平帽睡足僧堂月滿簾  
更上荒丘增百感當時樵牧禁曾嚴

九月十三日水部叔邀觀菊座上繼崇周長史

作用唐人韻

花前九月蜂蝶飛小春漸近秋意微金錢合爾籬下貴  
白酒待我山中歸賓當為主莫辭醉月未到夕先迎暉  
竹西崇岡更堪陟不負兩屐黏苔衣

寄龔時亨

背郭幽棲只數椽安心調息引流年  
午簷花動鳥窺戶春渚艇橫風滿川  
物妙每於閒處得時情都向嬾中捐  
懷賢更有千秋興細和陶詩復自箋

次韻靜觀野興

老年滋味淡為嘉一讀君詩信作家  
松塢風高聞落子菊籬秋晚愛餘花  
罇喧定得魚盈尺碓熟寧愁飯有沙  
更喜惠山泉在望水符分到便堪茶

過禪悅菴

小院春風送我來落梅香裏重徘徊菜畦黃動浮塵起  
泉脉清分古澗迴舊墨幾堪留卷冊薄雲如解襯亭臺  
相携無復當時侶野思閒情總自裁

次觀梅韻

樹樹梅開院宇寬紅酣白皙總宜看微風小徑青煙斂  
細雨春城曉色寒石畔倚栽苔蝕徧天涯折贈使逢難  
猶憐節候今年晚賞到花朝意未闌

次韻二泉午坐偶成

畫閣清深碧樹中  
時聞鐵馬弄微風  
無爭豈復論基勢  
不飲從誰問酒功  
依棟巢多來燕子  
遶門舟慣集漁翁  
晴光一片真宜麥  
步屨前榮見遠峰

魚燈次董學諭先生

燈事今年勝去年  
錦鱗飛出傍紅蓮  
光分太乙青藜火  
魂返琴高古列仙  
此夜含膏遊陸海  
他時燒尾入雲天  
尊前喜覩文明兆  
耳畔春雷已殷然

次青城翁見寄二首

滴滴新流漾  
白沙溪東遙認隱君家  
忽驚庭草生秋思  
送盡年光是物華  
絃斷古囊琴罷弄  
睡酣塵榻筆無花  
暑餘倦極何聊賴  
淨洗砂餅自煮茶

人間何處無塵沙  
老來似嫌猶有家  
碧潭龍去波自靜  
山石苔生膚亦華  
暑困倩誰歌白雪  
籬荒那復望黃花  
煙銷土銍日過午  
一勺清泉堪當茶

次韻蒲文玉代梅索句

山空江冷歲如何  
未省幽人不我歌  
雲掩日華天獨遠



春連臘底雪偏多  
巡簷敢望掀髯笑  
拄杖誰能踏凍過  
啼斷翠禽情脉脉  
暗香時自遶吟窩

月下觀蓮

荷花靚無語  
宛在水中央  
露深明月高  
下宿雙鴛鴦

昭君曲

但使胡塵靜  
蛾眉敢愛身  
千年青塚在  
猶是漢宮春

次韻水部叔山居雜興

纖塵不到室  
如禪書卷琴  
張總舊緣更有月  
瓢勝水遞

小渠分入惠山泉

癸亥二月六日五湖舟中酒盡而風雨適至戲

呈同行諸友

笑倚空罇謾咏詩  
篷窗浙瀝雨來時  
昏昏暮色中橋畔  
猶有青帘在短籬

宗鎬過予因留待雨用韻

竹裏清風忽報君  
雨將來處共看雲  
吾亭且為須臾坐  
案有坡公志喜文

夜泊蠡溪口號呈光懋

雨雪扁舟夜欲徂  
敲門無力任童奴  
不知畫閣深沉處  
曾有燈花報客無

玉簪花

月姊搔頭雪色瓊  
碧叢高插細香生  
夜深不用銀缸照  
山靄濛濛月自明

暮春追憶泉翁二首

知音人去罷彈琴  
風外庭花落更深  
剝啄不聞人跡絕

瓦爐香冷思惓惓

不因春去懶登臺  
花外小車那復來  
只有舊巢雙燕子  
尚依賓榻故旋迴

曰馴弟鵲鵲扇頭

幽禽相逐上枯荷  
原上秋光太半過  
對畫定因難棄此  
白頭兄弟已無多

喜晴

頑雲宿雨二旬彊  
村落家家久築塲  
今日碧天開萬里

殘砧聲裏愛斜陽

近午獨行溪上

拍岸新波泛落紅  
柳絲撩亂颺晴風  
不知餘得春多少  
行過溪橋日未中

次韻酬錢信之惠詩

夢想春湖拍浪花  
蘭芬蘅色滿津涯  
何時買得橋東棹  
來借閒鷗一席沙

海天鳴鶴圖為張真人作

老鶴長鳴海日升  
珊瑚樹長玉陵嶒  
樓臺十二春無際  
人在蓬萊最上層

晚冬雜興

老年猶自愛觀書  
晤語無儔意有餘  
鳥雀近人庭日暖  
起扶筇竹步徐徐

石倉歷代詩選卷五百二

欽定四庫全書

石倉歷代詩選卷五百三

明 曹學佺 編

明詩次集一百三十七

繆璉

遊羅漢寺

溪南有禪寺此地古來幽  
未問三生話先尋半日遊  
山林紅樹晚池水白蓮秋  
聊爾題詩句安能占上流

題獅藏精舍和黃文盛先生韻

旁搜遠紹究玄微  
馬帳高談夜卧遲  
金鐸聲揚多士化  
瑤琴音奏少人知  
夢回鳳宸長驚遠  
吟對獅峰屢獻奇  
滿眼交遊無限樂  
相看又過暮春時

送雲塘家兄之任臨高

聞說瓊臺好宦遊  
休言千里宦途修  
天門領鐸新承職  
闕里辭家不暫留  
花底離情添別酒  
馬頭春色壯吟眸  
鱣堂擬聽三台北  
蚤寄音書置使郵



七夕夜酌別來寄雙峰黃先生

曾記相逢當七夕，星河炯炯鵲成橋。  
竹松軒下詩情好，瓜果庭中酒興饒。  
寶篆焚香煙氣裊，絳紗籠燭影光搖。  
別來愁思知多少，琪樹西風葉亂飄。

贈江夏黃文弼先生和韻二首

神武門前早掛冠，爭如先已卧江干。  
竹窗酒醉春風暖，梅屋詩成夜月寒。  
塵榻久緣徐穉設，瑤琴長為子期彈。  
庸才欲結羣英會，猶恐山樊雜蕙蘭。

考槃甘許留泉石製錦何須問織縑  
滿院啼鶯驚着枕一庭飛絮怕鉤簾  
玉堂風月心無慕茅舍煙霞志自厭  
穆地故人何處是雙峰雲樹幾回瞻

雲塘別墅

獅山山下石泉清鑿得方塘一鑑平  
水面磨光雲影照天心沉碧月華明  
龍魚夜聽風雷化花木春承雨露榮  
佳致不同歌舞地藜牀燈火有書聲

送邑庠師劉先生致政歸淳梁

振鐸談經事可誇  
詞源洶湧浩無涯  
幽情恐負青山宅  
歸興應懷黃菊花  
寒浦風高先解榻  
秋江潮上便乘槎  
青蘊事業休嗟冷  
苜蓿盤中道味賒

寄雲塘兄海南

曾記臨岐別雁行  
歲華猶換幾風光  
瓊山天遠難飛夢  
姜被宵寒獨卧霜  
鱸膾謾懷垂釣石  
鱸魚還集講經堂  
榮歸林下知何日  
聊寫封書思渺茫

泮林春意和邑庠師李希賢先生韻

金闕紅雲曉正開除書榮捧八閩來長才已富三冬學  
健翼曾冲萬里回夜雨青藜明絳帳春風吟屐印蒼苔  
泮林剩得韶光趣池草詩成細品裁

雲霄回首倦飛黃鐸振黌宮聲已揚虛館久懸延士榻  
寒毡長坐講經堂杏壇雨洽先生化槐市花期舉子忙  
他日功成宜顯擢鏘鏘鸞佩列朝廊

數仞宮牆禮樂區洋洋儒教遍名都溪梅破玉年光換  
庭草留芳春意敷酒興每邀花下月詩情多寄柳邊湖

堪誇一代斯文盛  
洙泗淵源有遠模

寄中山劉先生

迢遞中山碧海東  
煙波無處下孤篷  
鶯花易逐春光暮  
雲樹空勞眼力窮  
流水音稀琴嬾奏  
致書郵遠雁難通  
多情只有西樓月  
一色嬋娟兩地同

次郭栢庄先生見寄韻

小亭瀟灑晚涼天  
風遞荷香入酒筵  
流水琴音清奏曲  
博山爐篆細騰煙  
青蒲綠笋常留客  
羽扇綸巾半學仙

世事到頭須自足休言騎鶴與腰纏

遊羅漢寺

咫尺招提久倦登今朝乘興訪名僧  
空庭過雨苔偏滑老鉢藏龍水自澄  
雲伴鶴行松下露樵衡猿抱澗邊藤  
留題泉石歸來晚踏破前山翠幾層

同寧德林柏山秀才家兄雲塘舍弟竹溪遊  
羅漢寺分韻得羅字

春風衫子試香羅有客攜壺別院過  
塵世得閒能幾日

溪南休把醉人呵

鄭鵬

字于溪閩縣人有編菴集

寓鐔城寫懷

幽懷不成寐蟲聲苦喧啾披衣起待旦殘星屋西頭區區一寸耿耿千百憂飯牛歌憤抑試問人知不

題畫

流水盪白石浮雲礙青山亭臺倚蒼翠樓閣空濛間小橋日已暝採芝人獨還臨流者何為似昔扁舟閒

題崆峒圖壽祝永明

吾聞崆峒山岷嶴三萬丈星辰羅層顛雲霞罩蒼莽琪樹  
競芬芳石室廓弘敞伊昔廣成子於茲抱玄養日月參輝  
光天地同沆茫猗歟度闕翁千載契心賞拂袖凌紫霄跨  
鶴遙相訪欣然許相從無極恣來往祝君真仙姿襟懷多  
倜儻長謝軒冕榮赤澹聲色想諒是長往人不待智者  
獎慚予骨相凡齷齪墮塵網金光許共餐願言執鞭鞅

題醉漁圖



去住一葉舟卷舒一竿竹朝從柳岸過夜向蘆汀宿魚  
多不賣錢村酒換盈斛鮮膾簇銀絲芳香雜野菽老妻  
笑傾壺稚子歌擊筑醉來橫短楫披襟坦便腹月明風  
露淨蘧然睡方熟隨流任所之自信穩於屋嗟彼塵世  
間風波平地伏紱綬成拘攣車馬生跼蹙華亭鶴不聞  
千秋傷二陸

遊東禪次楊部君謙韻

遊興殊未窮復此溪堂集焚香坐隱几塵心澹然戢輕

颶侵葛涼微雨灑花濕竹懶卧不醒山色秀可挹子雲  
有高詠載賡慙掇拾歸騎晚駸駸長空飛鳥急

治平燕集與吳次明蔡九達文徵仲錢孔周王

直夫湯子重王履吉

扁舟出橫塘直度彩雲橋治平忽在眼雙松見高標開  
筵照湖水放歌凌紫霄諸賢各有適局戲爭盧梟揚帆  
指歸路斷鳥暮天遙倚蓬有餘興明月不待招

題唐有懷畫扇

儒仙本絕俗，筆下開丹丘。雲霞敞奇勝，松桂凌深秋。羣峰簇天外，碧海芙蓉浮。訊彼丘中人，何當招我遊。對之清興發，岸幘浮青州。

仕宦不得意二首

仕宦不得意，歸來出無車。徒步義所安，焉敢競馳驅。一枝古筇杖，瘦硬蒼玉如。持之置左右，出入聊相須。仕宦不得意，歸來食無魚。平生藜蜨腸，不羨甘與腴。古人曲肱樂，蔬食飲水餘。肯為區區者，頓使初心渝。

題靖節圖

八旬彭澤令胡為賦歸來不為折腰勞亦豈為啣杯世  
事與心違感之良可哀見幾苟不早屈辱終難排柴桑  
五柳下茆屋荒蒼苔松菊喜猶存田園多草萊力耕課  
僮僕衣食聊自媒生死等蜉蝣軒冕輕塵埃勸酬雜農  
圃歡昵及孺孩意適輒有吟落筆忘敲推縱心信所如  
澗曲山之隈衡門向夕啓孤舟正沿洄妻子笑將迎雞  
犬亦喧豗乘化樂天命靡復縈所懷緬茲絕代人清風

動九垓廉頑與立懦身沒名不灰我生千載後仰止心  
悠哉風簷讀公傳白日青天回

洗衣行

若耶溪中新水滿女郎澣濯溪邊晚微波蕩岸濕金蓮  
返照侵衣明玉腕洗衣最恨啼痕多不洗啼痕將奈何  
杵重心忙臂轉弱斑斑血淚難消磨徘徊指顧荷花語  
妾愁莖內絲千縷摘來不斷復相聯誰識蓮中心更苦  
洗衣洗衣復洗衣菰蒲風急鴛鴦飛鴛鴦雙飛看漸杳

何事人生不如鳥

秋江獨釣圖為許啓衷賦

穹林昨夜商飈起面面芙蓉削空紫洞口寒泉一派垂  
直瀉銀河數千里竹籬茅屋連山坡上方樓閣驚嵯峨  
輕車細馬謝塵跡梵僧野老時相過漁翁獨泛扁舟小  
百尺絲綸青嫋嫋松聲聒耳喧寒濤澹澹長空絕飛鳥  
殘月孤雲幾醉醒蘋花洲渚蘆花汀君不見磻溪釣叟  
年八十一顧成周有餘力

寄東庄老人

東庄老人巢許儔林泉高卧輕王侯半生畎畝有餘樂  
牙籤萬軸堆牀頭興來時或杖短策高隴平溪恣登陟  
狂吟長嘯煙雲間世上千端慮俱息有酒不惜呼隣翁  
瓦盆滿注真珠紅山肴野簋羅飣餼陶然擊壤歌重瞳  
空齋客去惟高枕曉日穿窻猶未醒覺來好鳥花間啼  
坐對青山試新茗薜門蘿戶日長闌笑看浮雲自往還  
明月半輪臨綠綺薰風一曲破朱顏吾聞此老驚且喜

迢遞江山隔千里安得相從學弄丸一樽共醉東莊裏

題朱買臣負薪圖

噫嘻此是朱買臣貌來未識真不真夜窻展玩發長嘆  
爾來四十誰相親凌晨引斧入山麓向晚出街來賣薪  
書聲隨擔不輟響孔顏恍惚交形神此時敝衣兼破笠  
他年紫綬輝朱輪庸儒奔走且駭汗舉頭悵望瞻車塵  
乃知窮達有定命古來如此非君身會稽愚婦君莫嗔  
于今更多白眼人



題元人畫

峰巒馳突如奔馬萬頃澄江練光瀉閒庭邃館掩清秋  
嘉樹陰陰覆平野山椒寺隱見浮屠中流小艇懸輕蒲  
桃源輞川無乃是興來欲狂忘披圖

窻前小桃盛開不獲宴賞

小桃春前疑無花幾回攀樹成咨嗟豈知時節自然到  
千枝萬葉紛如麻今朝照眼如雲錦正好一樽相對飲  
無端塵事又相訪窻下無言歌倦枕

二蟲歎

蛛絲網飛蟲日足充飽蠶絲濟民生一身不自保事  
功大異報反施果物自為天梏之小人生全君子殪若  
比二蟲無乃似此理欲詰嗟無由起拍闌干雙淚流

禽言三首

快快插禾清明穀雨天氣和田中水滿禾易長轉眼便  
是人催科快快插禾

子歸子歸胡不歸田園既蕪屋成灰遲遲吾行當訴誰

王門鼓瑟不如抱竽吹鬚髮改變筋力衰不歸不歸更何為

提葫蘆沽美酒三百青銅何處有桃花落盡杏花殘十分春色今無九縱遇採樵人勒馬空回首況又多年失孟光一斗憑誰藏既久忍聽提壺休飲酒

發衢城

晚發衢城外中宵宿遠岑亂雲迷客夢微雨碎鄉心犬吠知村近泉鳴覺澗深淒涼無復寐起坐更沉吟

曉行

觸霧乘殘月肩輿趣曉程無林還鳥語非澗却流聲乳  
雉冲人起耕健帶犢行茲遊真孟浪慚媿棄繻生

次鄭繼之南湖舊居

使君湖上宅面面俯淪漪魚鳥馴相狎煙雲靜與期  
人供谷竦漁父課鷗鷺一被塵纓縛悠然繫夢思

春郊候同遊不至

羈思寂無聊尋春過野橋草新兒馬逸柳穉乳鶯嬌俗

事終難遣良朋亦費招  
胃中多磊砢謾詫酒能澆

寄翁世衡

迎薰亭上景想見別來深  
庭竹添新玉園柑富晚金  
篆煙清午夢古畫續高吟  
未得同幽賞空馳千里心

寄李尚賓

別院隔塵囂高懷未寂寥  
綠漪君子竹紅醉美人蕉  
湖海閒心健朋儕樂事饒  
客窗風雨夕時復夢招邀

晚酌池上

碧月晚雲留清波細縠浮魚梭時一擲螢火忽雙流酒  
盡鄰僧續詩成穉子謳蕭然天地裡忘却異鄉愁

蔡九遠文徵仲王履約湯子重王履吉諸知己

自吳來訪懼數日別去悵然增懷賦此奉寄

憶昔從諸彦真同弟與兄每耽文事樂時泛酒船行歲  
月蹉跎意湖山感慨情今朝重把袂應笑二毛生

夜宿奔牛鎮感事

颯颯風號樹蕭蕭雨打篷暮林已歸鳥遠寺亦鳴鐘絲

盡傷貧女場空泣老農微官慚寄祿為爾輟朝餐

芝城除夕

薄宦遷移日江城歲暮天可憐新白髮還對舊青氈故  
國餘千里浮生又一年東風翻巧勝吾意總蕭然

饒陽九日

此地逢重九蕭條倍往年愁深竹葉裏秋老菊花邊避  
俗從元亮登高憶惠連西風欺短鬢一任葛巾偏

回舟

金八八八八  
卷五下三  
已達王門禮還登使者舟片帆開曉日高枕卧中流葭  
葦迷荒渡鷗鷺立淺洲終年厭羈束聊此作清遊

哭王履吉

夢裡西川路分明舊石湖鵲原聲正急慈竹淚同枯川  
嶽還靈氣風雲負壯圖一杯澆宿草何日到東吳

途中七十

行年當七十旅邸遇生朝蒲節過三日松醪醉一瓢市  
朝空礪碌林壑好逍遙寄語王門客冥鴻不可招



月夜放舟追次蘇長公金山寺迴文詩韻

潮來湧浪觸堤傾，遠覺村中火滅明。  
橋峻駕空浮影曲，櫓新搖月叫聲清。  
迢迢思繞青林暝，拍拍懷舒綠野晴。  
遙寄好詩新恨洗，碧雲凝處去鴻輕。

天寧寺山房

山房鎮日伴僧閒，景物依稀與意關。  
絃管日教來好鳥，畫圖天為列青山。  
池留芳草供佳句，竹引清泉滌醉顏。  
勝事前林尤可賞，鷺鷥朝去暮飛還。

寄許黃門啓衷

一別年華又兩更望中雲樹總愁生  
激昂未信終無地慰藉常懷最有情  
給舍長聞新諫草客憲還對舊書檠  
祝君萬里身長健鄉國衣冠仗主盟

自遣

寓閑化寺

但得身閒好讀書不妨貧病似相如  
春花世事開仍落秋雨人情密又疎  
窻外好山青入坐門前細水綠穿渠  
令人翻憶磻溪老笑把長竿學釣魚

秋江寫望

睡起推蓬望去津  
眼前文物動新吟  
紅酣樹杪斜陽墮  
黛薄天邊遠岫沉  
雁落平沙秋野闊  
魚吹高浪暮江深  
平生最是耽奇勝  
肯為飄零負此心

東軒曉起有懷陳德階

春寒簾幙護重重  
高卧東軒適性慵  
千里關山千里夢  
五更風雨五更鐘  
情懷聊寄樽中酒  
歲月驚看鏡裏容  
何處鶯聲頻到耳  
令人搔首憶元龍

寄林利正

愛君瀟灑寓金臺乘興追尋日幾回  
神女多情離楚峽  
阮郎何事別天台  
也知壯志珍龍劍  
不管春愁損燕釵  
回首綠陰青子密  
空教杜牧悵重來

宿宣風館和伯安王公韻

屋後青山過雨痕  
門前新水赴溪渾  
風聲偃稻翻平野  
日脚穿雲射遠村  
世路多岐還委曲  
長懷最苦是黃昏  
家鄉迢遞音書杳  
腸斷深林蜀帝魂

舟艤衡湘登石鼓書院

蒸湘到此雙流合石鼓朱陵日夜浮  
終古乾坤留勝槩千年文藻仰前修  
平蕪落日漁歌晚遠漢西風雁字秋  
徙倚危欄望南嶽恍然身世在瀛洲

宿靈川呈諸同事

偶來寄宿靈川城眼前野景宜野情  
白雲護山曉未起蒼苔繡石秋還明  
獨行忽見碧潭影一曲礙苔滄浪聲  
宦途流轉無定在翻憐聚散如浮萍

清明虎丘陪祀有作

虎阜名藍近古城年年陪祀及清明  
生公舊石莓苔老陸羽香泉蝌蚪生  
劍氣已隨塵土沒霸圖惟見草煙橫  
古今何限興亡事不盡遊人感慨情

松江舟上

獨乘輕舸適雲間三月春光尚未還  
風雨昨宵仍陣陣草花沿路正斑斑  
堪憐酒轍修鱗困不似危巢老鶻閒  
笑我飄零成底事醉看長劍一開顏

送春

不見紅芳空綠陰  
臨階聊把一杯傾  
須知四序循環理  
莫訝三更杜宇聲  
棗杏看看催火改  
園林處處有蟬鳴  
王孫可恨歸來晚  
芳草淒淒萬里情

虎丘飲餞舟中書呈諸親友

畫舫夷猶野水濱  
異鄉相見轉相親  
岸傍灌木長含雨  
樹裏啼鶯巧避人  
高閣平舒千里目  
浮生未定百年身  
深杯到手休辭醉  
更與從容盡幾巡

九日懷姑蘇諸友因東孔周

轉徙江湖底事忙  
空餘雙鬢髮蒼蒼  
休嗟不遇馮唐老  
且學風流賀監狂  
稚子解歌秋水句  
美人偏阻菊花觴  
伊誰此際偏相念  
獨倚闌干憶斐堂

和徐秋官用中雨夜愁醒韻

暮雲忽共再相期  
客舍淒涼就卧遲  
潤入琴書猶未覺  
寒生枕簟已先知  
廟堂不見茆茨漏  
鐘鼎寧懷畎畝飢  
廣廈萬間思大庇  
少陵忠愛寔吾師



過常山示兒輩

蝸角蠅頭底事勞高牙大纛愧英豪敝裘慣被青山笑  
破帽頻將白髮搔忽見梅花驚歲暮強斟竹葉借顏酺  
不才棄置應吾分出處方將戒爾曹

覽鏡二首

頗覺衰容倍昔年敢將飄泊怨皇天求齊應悔徒工瑟  
作賦曾聞不值錢幽谷蘭荃長寂寞春風桃李易芳妍  
羈懷正爾無聊賴何處聲聲叫杜鵑

九萬扶搖志已訖情如籠鳥自慵歌春風又見新桃李  
鄉夢長懸舊薜蘿不事治遊非興減尚耽微祿奈貧何  
晨興盥櫛臨青鏡惟見蕭蕭白髮多

青雲樓

青雲樓上日徘徊風景平臨四面開宿霧每將城鎖斷  
夕陽長送鳥飛回萬家煙火湖山裏千里帆檣浦溆隈  
幾度輒興鄉國思援毫欲賦愧非才

殘菊

不忍臨階把酒鍾蕭條籬落淡煙中秋光轉眼渾如夢  
色相從前本是空直以盛衰觀物理莫將成敗恨天工  
明年擬辨今年醉只恐人如踏雪鴻

登平遠見亡友許啓衷書扁感而賦此

城市山林榜尚懸洞江居士久升仙忍過嵩嶽遷鶯地  
愁憶燕臺對榻年詩草闌珊誰為輯酒籌零落竟無傳  
古梅耆宿今俱朽俯仰乾坤一惘然

雨坐

元宵纔過又花朝美好光陰孟浪消屈指兼旬疎酒盞  
苦心臨水送詩瓢簡編相與權支遣風雨生增更寂寥  
小大乾坤咸自適鷗鵬何必哂鷦鷯

偶書

聰明不及前貧賤只如故感此惜流光援琴寫心素

水月亭

四徹澹空明清輝映寒玉欲將五十絃中夜彈一曲

湖山觀

樓閣搖清波亭臺隱孤嶼時聽笙簫聲雲端下仙侶

坐

樓外雨初收樓中人獨愁一聲何處雁驚破五湖秋

題文徵仲小景

竹橋橫小澗泉響落空山惟有幽棲客扁舟恣往還

春行

一溪桃雨流紅去萬壑松風響翠來即景欲吟吟未得

春衫隨處坐莓苔

悼亡

獨倚江樓賦大招  
潛然雙淚落春潮  
潮聲和淚東流急  
流到錢塘十五橋

送于光弟還閩

清貧宦邸嘆淹留  
又向吳門上去舟  
遙想西堂風雨夕  
也應孤枕夢蘇州

昭君


黃金底事賂傳神  
未必丹青勝似真  
只道君王明萬里

寧知不識掖庭人

餘千道中

樹繞前灣水拍堤白雲極目遠天低春光已逐飛花盡  
猶有多情鳥自啼

雨颺東風亂打篷聲聲都入客愁中一春閒却登山屐  
且向江湖訪釣翁



石倉歷代詩選卷五百三



# 欽定四庫全書

集部

石倉歷代詩選卷五百

五四

詳校官石中允臣薩敏

侍讀臣孫球覆勘

總校官進士臣朱 鈐

校對官編修臣吳裕德

謄錄監生臣朱 恩

欽定四庫全書

石倉歷代詩選卷五百四

明  
曹學佺 編

明詩次集一百三十八

王寵

贈別家兄履約會試

吾宗素貧賤被褐垂百年  
哲兄自鷹揚尺水升龍淵  
懷玉不得掩譽命逮九天車  
馬爛盈門勸駕以周旋  
辭親

邁觀國撫劍遠遊燕

其二

燕昭昔愛士縹緲黃金臺  
我明懸日月北極自天開  
左抱遼海隘右指雲中迴  
龍翔莫寓縣虎視下賢才  
河馬叶羲至岐鳳鳴文來

其三

徒旅各風氣語笑若為親  
道出齊魯郊相逢燕趙人  
山川日非故城郭屢經新  
驅車太行麓飲馬濁河津  
日暮

黃雲合誰當訴苦辛

秋日侍蔡師宴湯二子重

我師發林屋五夜翔天帆衣裳動雲氣猶自桃花品爭迎白鹿  
車冠蓋道相銜李邕傾後輩魁岸識虬髯湯也定同社登堂袂  
交把驚座得文翁琴瑟調大雅昔別春復秋心事一披寫麒麟  
已翔空吾道猶在野聖人奏雲門江湖自蕭灑商飈薄炎赫烹  
午雷破壁崩奔三峽流危聳四座客賓跪請間觴玉饌轉狼  
籍平生狂奴態醉舞拓金戟回頭指葛強何似銅鞮陌

晨興

中宵雨衝黑晨興慨知秋空庭曳葛屨落葉辭梧楸冥  
冥白日翳淪淪玄雲浮鷗鷺劃起舞蟋蟀嘯其儔端居  
覽物化六御無停輶悠然眷卒歲蒙茸思我裘若華不  
可折注目崑崙丘總髮未聞道忽忽甲子周赤霄有天  
驥窮路多蹇牛古人去我久日月成阻脩豈無萬里志  
蹇足空夷猶浩歌激宇宙烈士痛年道

贈劉太僕元瑞

江漢國之紀南嶽涵春容金晶走月窟大澤蟠人龍劉  
公豈易得磅礴秀所鍾本家江東將銅虎冊帝封奇才  
握銳穎弱冠推文鋒射策上玉堂天子維孝宗龍姿古  
堯舜千春會其逢一麾出郎署再歷粵與雍豈惟甘棠  
茂坐見俎豆龔名高貝錦織褫帶還山農張敞起亡命  
馬援鎮蠻邛東山夢猿鶴西徼來奔衝窺圖伯禹穴奠  
玉茅君峰玄牝抱虛一瑤華掇丰茸重離炳大角袞職  
思彌縫公望允律屺台階佇升庸權奇甲在腹礪礪星

羅胸朗朗百間屋森森千丈松天閑萬駭北肅穆大輅  
從衛文秉塞淵和鸞舞噤噤秋高鐵騎疾猛士乘金墉  
黃河控鳴鏑青海沉邊烽經綸在名手田野庇疎慵

寄贈王憲副欽佩

鍾山表天闕紫翠摩荆揚長江走其下河漢森七襄精  
靈炳人傑樂只邦之光明庭奠大呂絕壑蟠豫章卓哉  
丈夫特朱鳥相迴翔憶昔都下遊白馬南宮郎清溪映  
甲第才木羅堂皇蕭疎揚雄宅羞怯陸賈裝五陵豪俠

窟朱門擁貂璫夫子抱遺經玄草滿空牀時從高陽侶  
斗酒換鸕鷀彈暮夜寥闌撫劍天蒼茫顛倒尚方履氣  
氤官署香自顧草間人摧眉愧琳琅斗柄忽五轉旌車  
限河梁洛邑天下樞雄麗古帝疆人文圖書窟地軸嵩  
少陽絃歌億萬戶章甫三千行吾道有盟主中州耀星  
芒六經貫宇宙日月懸穹蒼維持藉公等湖海漫摧藏

還山作

久欲歸西山囂誼謾鞅掌青陽麗江臯茲焉諧所賞巖



餘白雪停水接紅霞上地軸隱墳夷天池滙決潏鮫人  
靜安流玄牝遺清響秀色浴層巒虛光涵萬象川原信  
沃腴景物初駘蕩覽化自靡窮適性非外獎彼美丘園  
貴眷言興我想

其二

恭承休明日九軌今一家進則綰龜玉退則蟄龍蛇吾  
道苟不虧安用事咄嗟山川日閒曠土風頗清嘉躡步  
陵絕峴流目翫歸霞鳴嚶藹以豫陽林萸漸花風光枝

上汎日采水中華感物眷彌結悟空理已遐永言詠玄  
寂聊以遣紛拏

入林屋洞

白鶴已仙去碧山遺寶符齋心扣靈闕企石窺清都雲  
堂裊撐拄百人可跣趺白玉斲隆棟青蓮綴流蘇昔人  
鍊液處牀第鬱金鋪石乳纍而長交錯如珊瑚蛇行屢  
迴互磬折窮有無恨乏嵇生識鳥篆空糝糊時聞神鉦  
鳴地底越江湖冥濛翳日月窈窕通蓬壺悠然遂雲卧

心將天與徒羽毛如可就千載有龍徂

入銷夏灣

千山翫迴轉雙闕開嶙峋圍作玉鏡潭流水桃花春雞  
犬自甲子衣冠乃秦民表裏重湖阻丹青四望勾孤峰  
表日觀羣嶂摩天垠波光別駘蕩霞采相鮮新疑觴西  
王池誤攀織女津海鷗戲蘭薄游鯈瑩心神牙檣悲昔  
年玉輦罷今巡榮華無常玩山水有天真塵纓聊以濯  
慚爾權歌人

丙洞

天傾霞石開日映雲門敞芙蓉秀絕壁齒齒排仙掌下  
窺黯無垠側眺紛有象丹藤蔓冰壑蒼苔蝕銀榜野鹿  
浥飛泉寒兔逃平莽攀蘿眷仙靈折麻私嚮往訪道空  
名山前途浩浩漭漭誰令濁世憂扣我凌雲想

曲巖

乘雲欬先登攀崖紛廣眺孤峰上寒日平楚騰餘燒天  
高風物繁地迥山川竅饑饉乍陸梁哀鴻相叫嘯企石

揖雲帆披霞迎海嶠空水共汎瀾虛無自余照林深養  
谷神壁仄團景曜光風爛芝苓玉髓滋蘿蒿樵隱自夷  
猶末路多奔峭懷哉角里公千秋可同調

毛公壇

石門有遺營澗道時屢揭山迴谷籟長地迴林宮闕近  
峰鬱交青遙岑盪虛翠丹井週前除雲堂儼昔位毛公  
颯羽翼白日翔鸞轡自非山水靈胡為異人至石髓不  
盈握圖經減餘字樵人引蔓行鹿子銜花戲蜉蝣不崇

朝浮生淋如寄荷篠劒黃精終矣丘園貴

哭孫太初

叔夜天人流龍章混土木太初關中來鬢鬢騎白鹿恢  
恢天網外玉立青山獨倒着蓮花巾虹霓恣成服腰頭  
虎鞶囊自詫神仙錄高殮太白雪屢憩車箱谷層雲蕩  
其胸溟渤空兩目雄談豁古今饑鼠窺深屋賦詩聲殷  
殷月黑魍魎伏鏗鉤鐘律應突兀崖障矗斯人則云亡  
古調竟誰復天馬不受銜孤星墮南陸安石竟殞雞賈

誼終遭鵬草堂溝何在落日玄猿哭

分得滕王閣送盧駕部師陳

江漢紀南服衡廬奠朱方河山阻襟帶表裏望荆湘  
列雉鬱叅錯樹羽盡飛揚風清彭蠡瀨雲起昭丘陽  
帝子握龍節磐石荒楚疆中天抗瑤榭倒景垂虹梁  
鳴鑾謝千載遺構想靈光夫君勩王事流覽恣方羊  
霜淒百卉素日落千山蒼悼古志愴怵遭時氣騰驤  
北首睇辰極東指窮扶桑伏檻藐寰宇觀風歌吉祥  
言歸報明主端

笏拱巖廊

送錢太常元抑祠祭顯陵

江漢朝百靈絳節集鄢郢興園奠其陽虹霓熠光景象  
設開天庭環衛森五嶺齋房產靈芝玉醴出金井神游  
駕虛無劍舄存遺影灑掃祠宮虔七鬯皇情耿太常典  
秩宗精白一心秉龍顏授玉冊殿上親祗領玄端佩衝  
牙陟降瑤壇靜風清靈旗翻天赤御氣罔宗禋日輝光  
松栢載崇整山河扶棟梁虎旅肅藩屏還軺告成命弭



節為俄頃備聞古夔龍密布金華省彷彿弘治風廷論  
多骨鯁我輩飽藜羹散髮從箕顙

奉同東橋顧丈夜宴賞菊之作

中歲無所成飄飄慕長生未諳鍊玉法采菊餐其英腰  
佩茱萸囊冠垂蘿薜纓霜中三秀茁石上九華榮明公  
挺鸞鶴翻飛辭玉京重此瑤草約遺彼濁世名玄夜共  
逍遙攜手遊太清折花竟誰贈俯仰千古情安得凌風  
翰一舉遂遐征

月夜登上方絕頂

五湖湧青蓮削出千丈壁空中構寶殿珠光相蕩射明  
月海上來照見半山赤千林似竦動鳥獸夜辟易飛馳  
入中天萬里掃空碧吳粵何茫茫俯視一氣白身列星  
辰間絕頂布瑤席舉杯酌銀河誤觸支機石回首招王  
喬吾亦成羽翮

石湖秋泛同段戶部子辛文太史徵仲

蘼落類莊瓠沿洄依孔桴冥心委江海屏迹逃人徒鶴

厲申獨往蠖屈謝當途持此百年操居然山澤癯兩賢  
顧同調枉檝臨家湖駢筵屬秋序嘯侶邁元夫初旭洩  
雲翳落景鮮霞鋪重霖豁朗霽商氣集高梧南陵絢丹  
碧北渚冒菰蒲瑤甍遞隱見羽節時有無陟峴禮精室  
乘峰眺名郭神超禮自逸世往迹與徂弔古指遊鹿歡  
今懷過駒請君謝天伐畢慮收桑榆

贈曲巖山人蔡師古

嘗登曲巖頂翠壁凌競行下屬帶林屋上千森太清崎

崦狐兔道斗絕芙蓉城天街太湖小日上東山橫奔濤  
激林響飛霧驚人聲雲光寫石鏡天籟摩風箏暫駐浮  
丘鶴長吹子晉笙坐來握玉髓饑至餐瑤英當時山人  
輩金策相支撐前身蔡經是師受王方平結廬古巖下  
桃花滿前楹麻姑復千歲指甲猶自輕丹書拂蘚讀玉  
女披霞迎親傳步虛唱彷彿鸞鳳鳴笑我晚學道碧山  
許藏名相期荷長鍾石上劖黃精

渡江望金山

肅舫沂洪濤掛石展奇峯頗懷濟川人復羨臨濠樂茲  
山絕地脈江海秀磅礴突起無曼延中流自澆滯太華  
巨靈擘龍門神禹鑿嶮峭由代工位置非天作仰干斗  
牛精俯枕川藪絡中虛釀靈潤外觀表封略樓宇盡騫  
騰嵐翠汾沃若潮音雜鐘梵人語怒蛟鱷陽侯戲其涯  
五采忽乘嶠趨捷慕飛猱凌厲憐孤鶴余本水鄉士夙  
負滄洲諾一丘可棲遲萬事甘零落

宿龍江

促柱多危絃勞歌無緩調遊子倦風湍羈人苦奔峭昨  
泝楊子津今宿龍江徼天高零露溥夜迴哀鴻叫爛爛  
金波翻耿耿玉衡照淅瀝蒹葭渚微茫煙水嶠川后戢  
澄瀾海童舒遠嘯臨深念畏途鑑止非要妙百年何鼎  
鼎恐貽靜者誚緬懷鴟夷遊側想任公釣解我樊籠役  
將窮山海眺

宴徐子仁宅

金陵豪俠窟樂遊鳳凰原青門臨上路爛若朝霞騫歎

侶共行遊。竚篠窺楊園。神飈集珍木。泣露被芳蓀。蘭池  
夏氣爽。桂棟秋雲屯。嘉花既羅戶。密篠亦植援。疏林抗  
北磴。激浪飛南軒。粲粲芙蓉披。離離椒芷繁。中堂理絲  
桐。後檻樹旌旛。初疑游龍翔。忽訝驚鴻翻。色授神已交。  
禮防心詎煩。主人卿雲流。標勝儷璵璠。已羅西園彥。復  
注北海樽。縱橫逸藻奮。契闊佳期敦。履舄相錯陳。釵纓  
互續繡。肴來乃鉶螯。觴至若川奔。曉畏夕月馳。宵忘朝  
日暎。平樂諒虛侈。高陽亦徒喧。縛麗安可悉。商確歌此

言

與王工部玄成游泛分詠橫塘

疊鼓發橫塘浮鷁在中央秋榮正靡靡曉岫復蒼蒼遠  
樹藹墟落平川趨石梁江南采菱調吳娃浣紗救日華  
波的皪霞采天蒼涼魚戲縠紋亂鳥鳴山籟長雲旗稍  
搖裔羽蓋亦悠揚傳卮已側弁徙樂更調簧上客金閨  
彥時飄仙署香弭節逗枉渚稅鑾導近疆繾綣瑤草約  
逍遙采真翔臨筵奉嘉藻願比雙明璫



陪宴孟中丞有涯作

青鳥顧鸞斯神龍延尺蠖大觀乃遺形采士及葵藿揆  
予慙浮賤擔簦游宛洛情同過江枳化異入海雀謁謁  
青雲居朝寺麗綺錯肅穆棲天人森沈響鈴索孟公中  
州彥逶迤象山岳逍遙冰井臺時傳臨海作解帶沐華  
園開樽睇蘭薄朝與山人期日晏褰珠箔縱橫飛爵歡  
下上論文樂玄纓非蘿帶朱門豈丹壑中飲獨徬徨念  
我東臯穫

飲顧淄川榮夫

昔美淄川謠今耽竹林賞解龜豈年及乘日非外獎偶  
會禽尚心彌肆雲蘿想經始中園廬蘭橑蔭閒敞清池  
過庭激紫蔓緣籬上薑芋抽新萌葡萄牽宿莽差池喧  
鳥覆澆潏驚魚響息陰聊舉爵臨涯時抱杖英英白雲  
游纚纚鮮飈蕩興遠集蕭晨蘊真愜吾黨蟬蛻迹已冥  
鸞翔意俱往方敷霞外交言稅區中鞅

登焦山作

農山興孔志疆臺試荆遊憑高易以愼樂勝令人憂挂  
席溯湍險振衣陟浮丘威紆隱百疊澎湃經四周江形  
繞成帶海氣賸為樓天吳几下舞若木窻中抽遙窮島  
夷界近覽東南陬萑英冒芳甸春色藹神州凱風嘯晨  
鵠青陽喧渚鷗雲鱗集潮湧桃花流隱淪既已逝  
倥傯亦空求悵悵千古心忽忽百歲道願垂任公釣聊  
謝張衡愁

秋征

修途錯昏晝曜靈匿朱光烏雀夜各歸游子獨迷方征  
途遽隱見落落參與商前驅入谷底後乘超山陽沮洳  
見虎迹詰屈驚羊腸洪流屢崩岸欲濟無津梁徒懷千  
金瓠未享五饋漿娟娟繁華子鼎食坐高堂王生驅九  
折臨路獨慨慷

臨淄行

虛危下流精采沂迺東峙樂謝爽鳩墟勛崇太公履山  
河控十二海岱錯表裏亡人忽龍翔纍囚遂鵲起名垂

天壤居世往陵谷徙談餘鄒衍風節慕魯連恥市藏陶  
朱俠路曜姬姜子喧闐鬪雞道烏奕鳴鐘里雄豪八方  
湊聲利三川擬寶瑟發東謳流黃織文綺大澤饒荏蒲  
濁河足鱸鮓欲歌泱泱風請自臨淄始

憶故園作

山空鳥聲樂日晏病客眠  
顰白雀院輟耕石湖田遙  
想蠶事作桑者日閑閑  
綠竹粉猶膩紅櫻爛欲然  
鯨魚泳綠水戴勝鳴高天  
飛絮乘風颺新荷貼水圓  
故園風

日好嘆息此芳年

陽春詞

春到江南春可憐東郊西郭得春先  
初飛蛺蝶猶疑夢忽見梅花各問年  
鸚鵡洲邊芳草積鳳凰樓下百花然  
王孫拾翠爭相問美女尋春總獻妍  
千金買得飛龍馬八寶裝成軟玉鞭  
啼鳥亂羣還自對游絲爭繞暗相牽  
勾吳樓閣如天上別有紅妝笑相向  
雲屏珠箔正昭回錦樹瑠花次第開  
傾國能誇神女賦凌雲還有茂陵才

欲移角枕鮫綃帳先掛冠纓翡翠釵春色年年歸有期  
勸君須惜少年時春去春來人不見花開花落日相思  
昨日朱顏渾似玉今朝白髮已如絲年年暗受傷春病  
不與楊花燕子知

石湖中流酌酒酣暢

總道金門隱方朔如何東山卧謝安青雲萬里絕鳥道  
凌競側足千峰攢饒蛟磨牙走其下飛蛇接翼相勾盤  
平生蕭散不經事清湖縱酒哀絲彈羅屏合沓出煙霧

金鏡滉養生波瀾孤洲斷岸疑畫出菱葉荷花俱已殘  
百觴自善鸚鵡舞九月不奈貂裘寒丈夫未用頗適意  
長房自愛壺中寬君不見翠華搖搖滄海西長楊羽獵  
鬪旌旗子雲勞獻河東賦正是君平賣卜時

酒酣贈王仲回歌

斗牛之墟真陸海河伯獻寶朝元宰珊瑚火齊光燭天  
百年吐翕精靈在仲回突出尤崛竒著書擬學樊宗師  
殷盤姬誥洞五內灝灝噩噩塞陸離閭風浮游拾瑤草



赤水罔象搜玄珠  
人文浩蕩踵今古  
日月環行江海紆  
我今獲落抱鉛槧  
羨爾快斫生蛟螭  
酒酣瞠目兀相向  
乾端坤倪恍摩盪  
荆蠻落照孤懷壯  
揚眉擊劍歌聲上  
泰階奕奕魁三象  
石渠虎觀排銀榜  
萬里風雲歛俯仰  
如君豈得終疎放

病起對鏡作

閉戶十日病骨僵  
手龜髮燥面色蒼  
朱顏綠鬢不相待  
俯仰天地為淒涼  
男兒勲業竟何在  
鏡中摸索求亡羊

古來相馬失之瘦龍文虎脊空騰驤憶昨結客少年場  
呼鷹走狗勢陸梁金盤賭酒爭五白銀燭嬌歌彈陌桑  
謂言富貴唾手取吹毛挿翼森開張十年獻賦不得意  
貂裘寶玦無晶光平生酒徒漸零落羞澁陰符垂虎囊  
學書無成學劍晚岐路側足心周章百年冰炭滿懷抱  
萬里鴻鵠方翱翔明朝散髮武陵去夾岸桃花煙水長

楞伽精舍同宿東橋顧丈贈歌

干將鏌鋁世罕得虹光熒熒日月側騰躍萬里浮雲空

秋水鶚膏淨如拭天生奇器貴斬斷神龍變化駭兩翼  
丈人胡為卧空谷白飯黃精鍊顏色憶昨朝帝蓬萊宮  
豸冠繡斧超拜崇太行以北黃河東十郡負弩旌旗紅  
男兒建節控全晉峭陵白日生雷風挂冠却出金馬門  
奏書承明辭至尊鹿車手挽載圖籍公卿觀者如雲屯  
人生一龍還一蛇邵平歸種青門瓜祗今對客東山下  
寧知豹霧縣摩高牙寵也江湖隱淪客窮途骯髒俗眼白  
乞鉢長依蘭若林吹竽恥入王侯宅中宵獨宿少微星

百年喜遇文章伯功名富貴亦何有鴻鵠冥冥薄南斗  
丈人不惜解金龜明朝還醉山中酒

午谷山人歌贈周別駕

終南太乙開咸京丹崖繡壁如削成白谷橫通子午道  
黃河吐洩金天晶高垂鐵鑠猿鳥窄倒挿屏障蓮花傾  
青林漠漠山鬼嘯紫雲隊隊仙人行中有太古巢居人  
披霞散髮攜道經時窺古洞獲竹簡獨荷長鑱斲茯苓  
形骸骯髒雜土木胸次錯落羅辰星邇來強起為赤子飄

然乘霓朝帝庭會稽山水聊佐郡騎驢高嘯窺東溟壯  
遊欲躡子長跡探古快讀秦皇銘當時巖壑依然在芝  
草琅玕幾樹青興酣唅望長西北眼中簸蕩涇水碧皇  
子陂邊落日明藍田關外秦雲白谷口子真謾招隱清  
廟明堂須柱石他日功成更拂衣相邀福地燒金液

題陳道復谿山障子

天台秀出鴈宕峰削壁飛泉如白龍跳珠散落四時雨  
偃蓋反走千尋松陰崕複洞絕地脉明湖玉鏡開天容

山深或聞虎兇鬪日落但有漁樵逢陳郎不減阮嗣宗  
雲霓蜷曲蟠其胸黃公壚頭枕麴卧蹶起掃出金芙蓉  
高山流水有深意却思荷蕢還山農

王子元肅有精廬在虞山下去白雀不數里緘  
書報之不過返棹悵然寄以長句

昨來棲卧虞山雲撫枕中宵苦憶君荒涼白雀古蕭寺  
鐘聲呪梵空林聞朝雲吐吞蛟蜃氣旭日滉漾波濤紋  
佛樓岌嶮列峰抱海甸蒼莽孤村分棟花風動雪乍捲

麥秋氣爽天無氛緘書報君君不遇孤鳳躑躑求其羣  
聞君山中有精舍面勢正直蓮峰下修篁萬挺球玉鳴  
懸泉百道飛龍挂房櫳窈窕閒且清花木玲瓏秀而野  
清風澹蕩堪揮麈白日陰森可銷夏此中共爾靜談玄  
快讀數過逍遙篇林間飽啜蒼耳飯石上一枕青苔眠  
不知塵網在何處翩翩自謂瑤臺仙差池萬事總難料  
振衣欲往空茫然我今暫返越來溪抱甕山中還灌畦  
秋高更禮虞山頂期爾縱躡青雲梯

陳道復舟訪遂攜同泛二首

我家濠水上落日嘯清流  
鼓柁慚相問傾杯忝共遊  
江空時影鴈風蕩半扶鷗  
恣意乾坤濶蒼蒼橫翠眸

其二

碧海孕明月天河倒列星光從  
波面湧清逼酒顏醒遠  
岸依沙白長林卷霧青  
百年渾得幾行醞莫教停

雪後石湖與諸友同泛

共有丘中好而揚江上舲  
花潭冰漾綠松嶺雪含青  
霽



色迴銀漢鮮雲捲畫屏子真歸舊谷為報北山靈

其二

多才自潦倒孰謂古人無雪照王恭瑩雲開范蠡湖故  
山饒酒伴修竹有行廚且逐林中鹿安能轅下駒

病

長卿復何望祇守茂陵田玉歷梅花外春心藥裏邊聲  
華渾似夢水月欲窺禪鼎鼎百年內千金誠可憐

懷顧台州華玉

總道天台守能迴寒谷春島夷通鳥道海市泣鮫人雲  
木吟蒼珮山河擁絳輪千年重領郡康樂是前身

望至惠山適雨霽

旭日開春霽殘雲變午霞登臨如有待山水更重華石  
乳初懸溜流嚶復滿花林中有肥遯吾欲傍生涯

一雲寺

古寺傍修篁玲瓏谷韻長空青搖水殿虛白闕雲房嵐  
氣山椒潤苔花石筍蒼坐耽清淨樂身世益茫茫

聽琵琶

紫塞傳龍撥崑丘學鳳鳴春風吹白雪總是斷腸聲

寄題楞伽新竹

問訊楞伽竹東風吹滿林鳥巢春谷暗龍嘯夜湖深石  
壁看雲氣山堂坐翠陰平生嵇阮興高醉聽浮沉

雨

把酒臨江雨披襟當楚風簾紋搖水際帆影落樽中赤  
電騰餘照青霞劃半空新涼殊可醉瀟灑淨房櫳

上方寺

山水雲門會林篁石道微毫光空翠落花雨瀑泉飛麋  
鹿叅金鏡莓苔積寶衣浮湛竟何益轉覺此生非

和黃勉之懷五嶽之作

嵩山有瑤草白玉如膏流何日攀緱嶺相携卧石樓吐  
雲騰斗極飛翠滿神州笙鶴飄颻去青天子晉遊

右嵩

五嶽視侯秩無如東岱尊六龍開御道三觀挿天門舉

手蓬萊近盪胸齊魯吞安期煉玉處唯見五雲屯

右泰

每憶仙人掌兼聞玉女峰兩崖夾日月西海出芙蓉窈窕黃河曲蒼茫白帝封手中九節杖恐或化為龍

右華

衡峰七十二削出祝融孤秀色浴江海神光照楚吳石開金齒茁芝長赤珊瑚何日登真籙腰懸朱雀符

右衡

玄嶽倚北極翠屏千嶂迴山寒太始雪地闊單于臺石  
室金膏闕玉華仙掌開儻遇通微子騎二青龍來

右恒

送陳子魚游齊雲巖

東南饒暑濕宣歙獨高寒秋色千巖競江流一線盤傳  
香歷金闕掃石拜天壇道氣如君少真堪躡紫鸞

紅蓮盛開漫興二首

茁茁照碧水芙蓉開紫房娟娟倚秋色冉冉下雲光意

態風前劇腰支掌上狂  
芰荷高日影雙浴綵鴛鴦  
秀色不忍見朝雲疑有無  
湘妃行拾翠天女笑投壺  
日映霓裳舉風迴玉袖扶  
若耶溪更好轉憶向江湖

送王子美

帝室五雲外子行如轉蓬  
關河秋水閘驛路菊花叢  
風急盧龍燒霜高碣石鴻  
金壺調玉鱠還復念江東

九日聞諸公竹林宴戲簡

九日逢秋霽羣賢集酒徒  
雲林千挺竹玉饌四腮鱸  
日

落山河淨風高鴈鶩呼茱萸都插遍還少一人無

次韻馬司成賦孫中允松園居

園接九峯翠池分三泖波青出隱叢桂白日卧高蘿林  
曉霞光粲窻寒竹蔭多金華榮侍從那得戀漁簑

雨後集諸子

雨聲催木葉秋序迫茱萸林吼風傳谷山蒸雲起湖客  
題幽澗竹人老故山蕪不盡窮途恨狂歌擊唾壺

雨



香雨濕金沙輕陰蔽日華山蒸飛殿藹海潤簇樓霞地  
僻喧啼鳥林深尚落花載窺清淨理畢志梵王家

上大學士守谿王公

威鳳冥翔萬里毛青山閒曳白雲袍五湖下上天池迴  
一柱東南日觀高玉洞朝霞食石乳璜溪秋水弄漁舠  
謝公不倦林泉賞無那蒼生屬望勞

彭蠡

彭蠡當年勤我師高皇親秉白旄麾荆人久已供王祭

劉渾翻然拔漢旗海內河山朝北斗  
帳前龍虎殿南維  
爾曹撲滅須臾事不動綃衣萬古垂

立秋日

南紀清秋殺氣遙扶桑銅柱萃高標  
風悲畫角關山迴  
雲去蒼梧畢斗搖正憶郊迎虛玉輅  
即愁邊守醉金貂  
黃河白草蕭蕭去胡馬千羣出射鵰

新葺草堂簡二三鄰曲

清狂自是耽風竹大隱何須倚市門  
背郭堂虛聊習靜

浣花溪遶即成村久拚江漢支離卧莫訝蛟龍屈宅尊  
北里南鄰俱酒伴祇應身世老清樽

袁氏山堂雨坐

六月虛堂雨氣浮翠巖丹壑迴生秋雷霆破地時酣鬪  
河漢經天却倒流古木蒼藤森自得斑鳩黃鳥坐交愁  
羣峰更覺煙嵐外指點陽臺最上頭

石湖作

勾吳山水秀西南雲白天青萬嶺含峭壁搏風時捲浪

中流湧日恣成嵐金支翠節虛無見貝闕銀宮縹緲參  
漣漣乾坤祇自役草堂長枕百花潭

曉

日高風細林中眠乳燕斑鳩鳴半天傷春老去怯花鳥  
痛飲朝來中聖賢流水高山心不競白雲飛絮夢相牽  
當門柳色青無賴誰為淵明乞酒錢

山堂

過雨山堂蒸翠雲四簷籐竹鳥聲聞青天不動峰丈坼

錦石相鮮澗道分流水桃花真隔世草衣木食自為羣  
籠鵞寫帖關幽興却憶風流晉右軍

夏日草堂撤去窻戶肆設簟几清風洞越藤竹  
交蔭悠然有作

錦石疎花暑氣清翠崖丹壑夏雲生已添海燕梁間語  
直看湖帆鏡裏行四壁驚風弦索響千林修竹簟紋明  
令人却憶王車騎更覺西山爽氣橫

和文侍詔懷昭慶寺之作

明光起草五雲邊猶憶同叅雪竇禪花雨石牀聽說法  
竹林茶鼎愛談玄拂衣未許還廬社飛夢時能墮輞川  
借問玉皇香案吏何如兜率鍊形仙

閒居

遶舍扶疎千樹林古臺鶯語晝沉沉山童佐舞調雙鶴  
病客閒居戲五禽阮籍猖狂讐禮法仲長樂志薄朝簪  
憑高更覺青冥遠弋者徒聞黃鵠音

遊覽與二三子作

芳挹北山桂，饑茹南澗芝。悠悠二三子，空谷白雲期。淨  
業青蓮宇，澄懷秋水陂。閒來展玉冊，興至引藤卮。自取  
山人適，而將玄化窺。朝隨野鶻出，暮與落霞之。龍性誰  
能擾，鷗機本不疑。形骸元土木，悔吝迺磷淄。是節方流  
火，涼飈清我肌。露華盈北渚，月彩耀前墀。松作笙簧聽，  
川將縞練披。酣歌似河朔，清燕類南皮。若問窮通理，蒙  
莊吾所師。

文二丈內翰過山莊作

蔣徑薜蘿合仲園山水圍憐君棄金馬數為訪荷衣酌  
醴枯魚爨調羹菰米肥溪溪水華淨嶺嶺秋霞飛林茂  
鳥聲樂山空人事違靜知觀槿暇歌識採菱歸密篠盈  
丹壑高花落翠微相招桂樹隱共息漢陰機身世杯中  
物生涯湖上磯洋洋泌之曲客去掩柴扉

曉

綠荷遙挺蓋紅蕉半捲書秋風一蕭瑟簷影散扶疎宿  
雨澄氛靄朝陽翔太虛人煙雜魚鳥山翠滿庭除碧委



梧桐始紅收菡萏餘天心察羣卉貞性在幽居峰態隨  
霞變瀾光與日舒莫將憔悴色貽笑楚江漁

秋夕

秋風日夜清房櫳有佳色悠然東窗下落落羣松直

東齋

旭日散高齋離離檀樾影焚香對寶冊古院蒼苔靜

湖上

石湖春色太可憐却似美人明鏡前錦甸平鋪鴨綠水

白雲飛動蔚藍天

題文待詔山中詩卷

康樂流傳臨海作一時文采魏羊何只今寓直金鑾裏  
還憶東山舊薜蘿

古泉新齋對丹楓作

紙窗斐几竹間房一樹丹楓倚夕陽  
啜盡茶甌猶不去  
野人偏自戀秋光

贈錢光祿元抑掛冠還山

春明門外玉河橋軒騎如龍半下朝  
總道羣公餞光祿  
山林鐘鼎各逍遙

又

羨殺漕湖即鏡湖桃花流水入虛無  
南歸不向君王乞  
原是滄浪舊釣徒

越溪莊作

翠竹黃花湖上村西風喬木撼柴門  
誰人解識支離子  
草屨牛衣自牧豚

夜

山腰小閣夜焚香煙滿平林月滿牀十里春湖明滅外  
竹枝歌散一天長

冬日

列岫盈窻紫翠屯孤煙時起灤西村日長幽鳥如琴筑  
院院松蘿靜掩門

春日吳子雨過山居作

雨重煙濃山更深半窻樓閣晝陰陰道書一卷香凝榻

巖翠千層鳥墮林

湖上逢曹子繩之

童子論交二十年舊遊獲落已茫然  
石湖三月梨花雨忽漫相逢野寺前

蠶忌

鶯老花殘不記春閉門蠶忌動經旬  
寧知畫閣鳴箏女墮地粧成錦繡人

石倉歷代詩選卷五百四